



Broj: 04-04-4-3378/24
Sarajevo, 30. 10. 2024. godine

SAOPĆENJE ZA JAVNOST POVODOM OBJAVE
REVIZORSKOG IZVJEŠTAJA O NAJVAŽNIJIM NALAZIMA I PREPORUKAMA
ZA 2023/2024. GODINU

Ured za reviziju institucija u Federaciji BiH je, u skladu s Planom revizija za 2023/2024. godinu, izvršio 107 finansijskih revizija, šest revizija učinka i 16 praćenja postupanja po preporukama iz ranije provedenih finansijskih revizija. Na osnovu obavljenih revizija, u skladu s članom 16. Zakona o reviziji institucija u Federaciji Bosne i Hercegovine, sačinjen je i objavljen **Revizorski izvještaj o najvažnijim nalazima i preporukama za 2023/2024. godinu.**

Provedenim finansijskim revizijama su obuhvaćene institucije Federacije BiH i kantona, preduzeća u većinskom državnom vlasništvu, kantoni, gradovi, općine, zavodi, fondovi i javne ustanove. Pored revizije Izvještaja o izvršenju Budžeta FBiH i konsolidovanih finansijskih izvještaja pet kantona, ukupno izvršenje budžeta/finansijskih planova pojedinačno revidiranih subjekata iznosilo je cca 9,5 milijardi KM. Od 107 objavljenih izvještaja finansijske revizije data su sljedeća mišljenja: **za finansijske izvještaje** 40 pozitivnih, 56 s rezervom i 11 negativnih; **za usklađenost sa zakonima i drugim propisima** 11 pozitivnih, 83 s rezervom i 13 negativnih. U cilju otklanjanja utvrđenih nepravilnosti i jačanja sistema internih kontrola dato je **1.975 preporuka.**

Revizijama učinka obuhvaćene su aktuelne teme od značaja za kvalitet života građana, i to: Učinkovitost poticaja u poljoprivredi; Inkluzivno obrazovanje u Federaciji BiH i Aktivnosti institucija na implementaciji Ciljeva održivog razvoja. Prilagođavanjem standardnih revizija akutnim problemima i specifičnim ciljevima i oblastima Ured za reviziju nastoji stvoriti nove vrijednosti i ispuniti očekivanja okruženja. Do kraja godine će se, u skladu sa terminskim planom, sačiniti još jedan izvještaj revizije učinka.

Osim najvažnijih nalaza i preporuka, u Revizorskom izvještaju su prezentirani različiti statistički podaci i analize prema vrstama subjekata, zbog čega on pruža sveobuhvatne informacije o korištenju i upravljanju javnim sredstvima u Federaciji BiH.

Izvještaj je namijenjen prvenstveno Parlamentu Federacije BiH, koji treba da vrši nadzor i traži odgovornost rukovodilaca za utrošena javna sredstva, i koji može, na osnovu revizijskih nalaza i preporuka, poduzeti odgovarajuće korektivne mjere.

Kao vrhovna revizijska institucija dužni smo da provođenjem revizija i blagovremenim izvještavanjem ukažemo na način na koji se upravljalo javnim sredstvima – da li se radilo u skladu sa zakonima i kako su se provodili programi i aktivnosti u pogledu efikasnosti, ekonomičnosti i efektivnosti. Veliku važnost pridajemo informativnoj ulozi tako što objavljivanjem revizijskih nalaza podižemo svijest javnosti o nezakonitostima i nepravilnostima u radu javnog sektora.



GENERALNI REVIZOR

Dževad Nekić